

**Illersornissaqarfiup sulisui pillugit inatsisip allangorneranut inatsisit aalajangersimasut****Kalaallit Nunaannut atuutilernissaat pillugit kunngip peqqussutaatigut  
atuutilersinneqarnissaa Namminersorlutik Oqartussat akuersaarsinissaat pillugu****Inatsisartut aalajangiiffigisassaat***Nunanut Allanut Sillimaniarnermullu Naalakkersuisumit saqqummiunneqartoq***Pillugu****Nunanut Allanut Sillimaniarnermullu Ataatsimiititaliap****siunnersuutip aappassaaneerpeqarneranut****ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Aleqa Hammond, Nunatta Qitornai, siulittaasoq  
Inatsisartunut ilaasortaq Múte B. Egede, Inuit Ataqtigiit, siulittaasup tullia  
Inatsisartunut ilaasortaq Jens Danielsen, Siumut  
Inatsisartunut ilaasortaq Mala Høy Kuko, Siumut (sinniisoq)  
Inatsisartunut ilaasortaq Justus Hansen, Demokraterne  
Inatsisartunut ilaasortaq Sofia Geisler, Inuit Ataqtigiit (sinniisoq)  
Inatsisartunut ilaasortaq Pele Broberg, Parti Naleraq

UKA 2020-imi ulloq 21. oktober 2020 siullermeerinninnerup kingorna ataatsimiititaliap siunnersuut suliaraa.

**1. Siunnersuutip imarisaa siunertaalu**

Siunnersuummi allannguutit marluk ataatsimoortinneqarput peqqussummullu ataatsimoortillugit Kalaallit Nunaannut atuutilersinnissaat kissaatigineqarpoq. Allannguutit marluk pineqartut tassaapput:

1. Inatsimmut allannguutit illersornissaqarfimmi sulisunut aallartinneqarsimasunut tapiissutitut soraarnerussutisiatut ittunut aammalu anniarnermut qasilisoornermullu ajunngitsorsiassanut tunngassuteqarput.
2. Illersornissap tamakkiisup siuarsarnissaanut sakkutooqatigiinnik upalungaarsimasussanik pilersitsinermut tunngassuteqarput.

Illersornissaqarfimmi sulisut assigiissumik atugassaqaarnissaasa qulakkeernissaat naalagaaffeqatiginnerup iluani sumiinneq apeqqutaatinnagu kiisalu anguniarneqarpoq

sorsuttoqassagalarpat ajornartoortoqassagalarpalluunniit illersornissaqarfiup upalungaarsimanerulernissaa siunnersuutip siunertaraa.

Allannguummi siullermi pineqarpoq sulisut ulloq 14. august 1996 sioqqullugu aallartitaasimasut aammalu sulisut ullormi tassani kingusinnerusumiluunniit aallartitaasimasut akornanni aningaasaqarnikkut taarsiiffigitinnermut tunngatillugu naligiissarneqarput. Taamaasilluni illersornissaqarfimmi sulisoq nunanut allanut aallartinneqarnerata nalaani aallartinneqarnerataluunniit kingunerisaanik innarlarsimappat toqukkulluunniit qimagussimappat aningaasatigut assigiinngitsunik taarsiiffigineqartarnej qulakkeerneqassaaq.

Illersornissap tamakkiisup siuarsarnissaanut sakkutooqatigiinnik upalungaarsimasussanut peqataanissamut piunasaqaataavoq, sakkutuutut ilinniarsimannngitsut imaluunniit sakkutuutut ilinniartut taamaammat aggersarnissaat periarfissaanngilaq. Piffissaq sakkutuut kiffartuussinissamut aggersarneqarsinnaanerata ukiunit pingasuniit ukiunut tallimanut sivitsorneratigut illersornissaq tamakkiisoq nukittorsarneqassaaq. Soorluttaaq pisariaqartinneqassappat siornatigut atorfeqarsimasut aggersarneqarsinnaalissapput. Sakkutooqatigiinnut upalungaarsimasussanut ilaasussatut toqqarneqartut qaammataini arfineq-pingasuni sakkutuutut ilinniarsimasunik pilersinneqassapput. Sakkutuujusussaatitaasut sakkutuutut ilinniarsimasut angerlartinneqareernerisa kingorna ukiut tallimat iluanni kiffartuussinissaannut aggersarneqarsinnaapput.

## **2. Siunnersuutip Inatsisartuni siullermeerneqarnera**

Siunnersuutip siullermeerneqarnerani allannguutit marluk assigiinngitsumik qisuariarfineqarput. Illersornissaqarfimmi sulisunik naligiisitsineq pillugu allannguut siulleq partiinit tamanit tapersorneqarpoq. Illersornissap tamakkiisup siuarsarnissaanut sakkutooqatigiinnik upalungaarsimasussanik pilersitsinnermut tunngassuteqartoq allannguutissap aappaa assigiinngitsumik isummerfigineqarpoq. Siunnersuummi Kalaallit Nunaat nunatut sorsuttartunngortinniarneqarnerasoq nalornissutigineqarpoq. Maani nunami veteranit qanoq atugaqarnerisut aamma kalaallisut taaguutit sorliit pitsaanerussanersut oqaluuserineqarput.

## **3. Tusarniaanermi akissutit**

Tusarniaanermi akissutit inatsisissatut siunnersuummi ilanngunneqarput, inatsisartut siulittaasoqarfiata ilusissatut piunasaqaataanut naapertuupput.

Tusarniaanermi akissutinut oqaaseqaatissaqarnatik Naalakkersuisut taavaat.

#### **4. Siunnersuutip ataatsimiititaliamit suliarineqarnera**

Siunnersuummi matumani illersornissamat sulisunut pissutsit allanngortinneqarnerat sakkutuujusussaatitaasunut allannguisusaaq aallarniutigalugu ataatsimiititaliap pingaartutut erseqqissarpaa. Taamaalilluni siunnersuut innuttaasunut nalinginnaasumik illersornissaqarfimmi sulisimannngitsunut tunnganngilaq.

Allannguummi illersornissaqarfimmi sulisunut siornatigullu illersornissaqarfimmi sulisimasunut taamaallaat sunniuteqassaaq. Taamaalilluni illersornissaqarfimmi namminnek inunnut sakkutuutut kiffartuusserusussimasunut tunngavoq. Taamaalilluni siunnersuut una tunngavigalugu Kalaallit Nunaat nunatut sorsuttartunngornaviannngilaq.

##### 4.1. Kalaallisut taaguutit

Illersornissaqarfimmut atatillugu maannakkut siunissamilu kalaallisut suut taaguutit atorneqassanersut siunnersuutip suliarineqarnerani oqaluuserineqarput. Tunngaviusumik Inatsisissaaq pillugu Isumalioqatigiisitami Oqaasileriffik peqatigalugu kalaallisut taaguutissanik ineriartortitsiniarluni suliamik aallartitsisimasooq oqaatigineqarpoq.

Ukiakkut ataatsimiinnermi uani immikkoortoq 196-ip suliarineqarnerata maluginiarneqarnissaa ataatsimiititaliamit oqaatigissallugu pissusissamisoorineqarpoq. Uani ilaatigut upalungaarsimaneq pillugu inatsimmi taaguutit 'innuttaasunik illersuineq' atorunnaarlugu 'annaassiniarmi upalungaarsimaneq' atorneqalissasooq siunnersuutigineqarpoq. Illersornissaqarfik pillugu kalaallisut taaguutit nutaat ineriartortinnissaannik suliaqarnerup ingerlaqqinnissaa ataatsimiititaliamit annertuumik pingaartinneqarpoq.

##### 4.2. Kalaallit Nunaanni Veteranit

Maani nunami veteranit qanoq inissisimani siullermeerinninnermi aamma oqaluuserineqarpoq. Kalaallit Nunaanni veteranit qassioqqissaarnerat aamma ujartorneqarpoq. Naalagaaffeqatigiinnermi atukkanik assigiissaarinerup qulakkearniarneqarnera pitsaasuusooq ataatsimiititaliamit oqaatigineqarpoq. Siunnersuutip aappasaaneerneqarnissaanut atatillugu veteranit qassiuneri ilisimatitsissutigissagaat Naalakkersuisut qinnuigineqarput.

#### **5. Siunnersuutip aningaasatigut kingunissai**

Inatsisartut suleriaasianni § 33. Imm. 1-mi allassimasut tunngavigalugit siunnersuutip piviusunngortinneqarnerani aningaasartuutit allaffissornermilu kingunissartinneqartut siunnersuutip oqaaseqaataanut ilanngunneqassapput.

Siunnersuutip piviusunngortinneqarnerani AC-mik atorfillip qaammatit pingasut sulinerata naligissagaat siunnersuuteqartumik nalilerneqarpoq, tassa ukiumut aningaasartuutissat 125.000 kr. Tamatumunnga ataatsimiititaliaq allatigut oqaaseqaatissaqanngilaq.

Siunnersuutip piviusunnngortinneqarnerani aningaasatigut kingunissaritinneqartut siunnersuummut ilanngunneqarsimasut killeqarneri ataatsimiititaliamit maluginiarneqarput.

## **6. Ataatsimiititaliap inassuteqaatai**

**Ataatsimiititaliami amerlanerussuteqartut** tassaasut Siumut, Inuit Ataqtigiit, Demokraatit aamma Nunatta Qitornai siunnersuut Inatsisartuni akuerisassanngorlugu **inassutigaat**

**Ataatsimiititaliami ikinnerussuteqartut** tassaasut Inuit Ataqtigiit siunnersuummut ima erseqqissaateqassapput:

Inuit Ataqtigiit aammaarluni erseqqissassavaa, Issittumi ineriartorneq tunngaveqartariaqarmat Ilulissani isumaqtigiissummit.

Taamaattumik Naalakkersuisut kaammattorneqarput kunngeqarfeqatitsinnut issittumilu nunanut allanut erseqqissartuassallugu, Kalaallit Nunaata kissaataa ersarissoq tassaasoq Issittoq sakkulersorfiunngitsoq.

**Ataatsimiititaliami ikinnerussuteqartut** tassaasut Partii Naleraq siunnersuummut ima paasinnipput:

Illersornissaq tamakkiisumi aaqqiineq sakkutuut kiffartuussinissamut aggersarneqarsinnaanerat ukiunit pingasuniit ukiunut tallimanut sivitsorneqarnissaa Partii Naleqqamit akuerineqarsinnaanngilaq. Siunnersuutip aningaasaqarnikkut allaffissornikkullu inuutissarsiutilinnut kinguneqartussaasoq allassimammat. Piffissamilu pineqartumi suliffeqarfiit sakkutuutut kiffartuussisimasunik sulisullit eqqorneqartussaammata. Danskit sakkutuuinut qulakkeerinninnissamut atorneqaratik nukiit suliffeqarfinnut atorneqarnissaat Partii Naleqqap kissaatigaa.

**Tamanna tunngavigalugu Ataatsimiititaliami ikinnerussuteqartut** tassaasut **Partii Naleraq** siunnersuut itigartinneqassasoq **inassutigaat**.

Ataatsimiititaliap taamatut oqaaseqaateqarluni isumaliutissiisummilu allassimanageratut paasinnilluni siunnersuut aappasaaniigassanngortippaa.




Aleqa Hammond  
Siulittaasoq



Múte B. Egede  
Siulittaasup tullia



Justus Hansen



Pele Broberg

Jens Danielsen

Mala Høy Kuko



Sofia Geisler